

1 Tesalonayka

Pol Minj Nind Ak

Tesalonayka Kuyip Tikak

Minim Nind Niņep

Pol Tesalonayka kuyip minim tep aņgņak ñin ak, Jiwda gunap, biynimb Jiwda mer gok Pol minim nup ak nep niņsipay aņgiy nup miluk niņeyak, Tesalonayka kirgiy am Biriya biynimb kuyip minim aņgņak. Kisen am Koriyn mindek Timotiy apiy, Tesalonayka biynimb Krays ker mindpay gok mindrep gipay aņgak minim ak sek, minim aņgņiņyak gunap sek aņgņek niņiy, kuyip minj kun biy tikak.

Minim Ar Keykey Mindip Rek:

Minim nind aņgak ak mindip, chapta 1:1.

Tesalonayka biynimb mindrep giyak rek, Pol nup tep gak minim ak mindip, chapta 1:2–3:13.

Biynimb suņ-tep nuk mindenimimb aņgak minim ak mindip, chapta 4:1-12.

Krays andkind winiņgamb minim ak mindip, chapta 4:13–5:11.

Minim aņg jiwning gos rek winjikak minim ak mindip, chapta 5:12-22.

Minim aņg jiwak day won ak mindip, chapta 5:23-28.

1 ¹Chin Pol, Salas, Timotiy nimbip Tesalonayka biynimb Gor Biyomb chin apiymiņay ak ker mindpim gok, minj tiksipun. Gor apiymiņay nimbip simb niņiy direp ger, mindrep ginimimb.

Tesalonayka Biynimb Gor Nup Gosimb Niņiy Mindrep Giyak

²Chin per Gor nup aņgņiņning nimbip sakiy ma gipun, gos niņmindi, nup tep aņgiyņg kuyip maņgiysek kond mindrep ginimin apun. ³Pen nimb Gor nup gosimb niņiy, aņgip rek giyiņg, biynimb gok kuyip wasemb ay direp giyiņg, Biyomb chin Jiysis Krays andkind winiņgamb aņgiy kond mindem amjap ak; Bapiy Gor nup aņgņiņyiņg tep apun.

⁴Chin niņbun: nimb mey, mam ay Gor wasemb ay dak gok mindpim. ⁵Pen chin Gor ker mindiy mindrep gipun rek, kiyk kunep mindeniņiy

aŋgiy, minim tep ak dand amiy Kawnan nuk ak chinup gos ñek, nimbip minim yipund giy yimb ak aŋgñon niŋiy dipik. ⁶Diy mey, Biyomb chinup gi miñ ar ak sek, chin key gipun miñ ar ak sek kisen gipim. ⁷Gipim kun ak, biynimb Krays nup gosimb niŋbay Akaya propens ak sek, Masedoniya propens ak sek niŋiy kunep gipay.

⁸Pen nimb Biyomb ak nup gosimb niŋem, nuk gek mindrep gipim minim ak; miñmon okok kunep amjap. Miñmon gunap amjakon, biynimb kun okok key kesim diy apay, ⁹“Tesalonayka biynimb kuyip minim tep ak aŋgñenbik, nimbip direp giy, tap yesek aŋgniŋyngipay gok kirgiy, Biyomb permindep ak nup nep aŋgniŋiy, direp giyng, ¹⁰Ninuk kumek Nop gek tikjakak ak andkind asaw aŋgiy, kond mindpay apay.” Jiysis kun ak nep chinup kond mindip rek, yiwur yomb ak ma diniŋgambun.

Pol Tesalonayka Mindiy Woŋg Gak

2 ¹Mam ay sikop. Nimb key niŋbim: nind miñmon nimb ak amiy, Jiysis minim tep ak aŋgñon, niŋiy dipik. ²Ñin kun ak miñmon Piyliypay nind amiy aŋgñonuk, biynimb gunap chinup minim timey aŋgiy, timey giyak ak pen; Gor chinup kond mindek, gos kun ak ma niŋiy, miñmon nimbip Tesalonayka am aŋgñonuk kunep giyak ak pen, monmon aŋgñinuk. ³Kun ak niŋim! Minim nimbip apun ak yesek aŋgiy, tap nimbip gok diniŋg akaŋ, timey giniŋg ma aŋgñinuk; minim tep ak niŋyaŋ aŋgiy aŋgñinuk.

⁴Minim chin key ak aŋgon, biynimb gok kuyip tep gaŋ aŋgiy ma aŋgñinuk; Gor yergiy rek mindpay ak key niŋimb rek, chinup woŋg aŋgayek, nimbip aŋgñinuk. ⁵⁻⁶Nimb key niŋbim: minim nep aŋgon kuyip tep ginimuŋ aŋgiy, nimbip ma aŋgñinuk. Maniy tap gok dun aŋgiy akaŋ, yimb yomb dun aŋgiy ma aŋgñinuk ak, Gor kunep niŋimb.

⁷Pen bi Jiysis minim dand amemb mindpun ak, nimbip minim kasek aŋgniŋg apnup ak pen, kun ma ginuk. Biyn gok ñapan kiyk key tikiy, dirangrep gipay rek ak ginuk. ⁸Nimbip wasemb ay aŋgnuk, “Kuyip minim tep ak aŋgñon, biynimb gunap chinup ñaŋgniŋg ñaŋgniŋgiy aŋgiy, nimbip aŋgñinuk.”

⁹Mam ay sikop. Nimb niŋbim: nimb yip mindiy, kosyam tap keñmangiy chinup pipang dap ñiniŋgambay aŋgiy, pumbnamb Gor biynimb diniŋgamb minim tep ak nimbip aŋgñi taŋgyngipun; kisyimken maniy woŋg giy tap ñimbyngipun. ¹⁰Chin nimb biynimb Jiysis nup gosimb niŋbim gok yip mindyng, kapkap mindrep giy, tap timey akaŋ, tap minim aŋgniŋgiy rek bap ma ginuk. ¹¹Nop sikop ñapan kiyk key aŋgñirep gipay rek nimbip ginuk. ¹²Gor chinup diyn aŋgiy dek, biynimb nuk yip perper mindoniŋgambun gok mindpun ak; kapkap mindiy, aŋgip rek ginjun aŋgnuk.

¹³Pen nimbip minim tep aŋgñonuk; minim kiyk key ma aspay, Gor minim tep ak aspay aŋgiy dipik ak mey; Gor nimbip kond mindakniŋ,

aŋgip rek gipim. Kun ak Gor nup tep aŋgyiŋ mindpun. ¹⁴Pen mam ay sikop. Biynimb chin Jiwdiya akay, chinup biynimb Jiysis nup nind gosimb niŋnuk gok timey giyak rek, miñiy Tesalonayka biynimb gok nimbip gispay. ¹⁵Pen Jiwda biynimb gok Gor nup miluk niŋiy, biynimb okok miluk niŋiy gipay. Kiyk bi Gor minim aŋgep gok kuyip ñaŋgiy, Biyomb chin Jiysis nup ñaŋgiy, chinup yukyokyak. ¹⁶Biynimb Jiwda mer gok kuyip, Gor nup gosimb niŋniŋiy aŋgiy aŋgon, Jiwda biynimb kun gok kal jiwiy, timey yimb nep gipay. Gipay kun ak, Gor gek miker yomb yimb ak kuyip dip.

Pol Kuyip Tip Am Niŋiyn Aŋgiy Niŋak

¹⁷Mam ay sikop. Nimb yip mindon, Jiwda biynimb chinup yuk keykey yokyak ak, simb gakniŋ mindpun. Nimbip am niŋiy owun aŋgiy, gos ak niŋmindpun. ¹⁸Yand Pol per gos kun ak niŋbiyn ak pen, Seytan kinjeŋ tikip. ¹⁹⁻²⁰Pen nimbip sakiy ma gipun: tep gakniŋ gos niŋyiŋ mindpun. Biyomb chin winiŋgamb ñin ak, nup tap yerip rek ñoniŋgambun; tep giniŋgamb? Nimbip nep. Nimb biynimb nuk mindeniŋgambim ak niŋek, tep giniŋgamb.

3 ¹⁻²Pen nimbip am niŋun aŋgiy, kasek amemb rek ma ayek, nimbip simb niŋiy, chirmiŋay miñmon Atens mindiy, mam Timotiy bi Gor wong giy, Krays minim aŋgñirep gip anup, aŋgyokor nak. Pen nup aŋgruk, “Jiysis gosimb ak niŋiy aŋgip rek gipay ak, kuyip timey gispay. Nand am kiy yip mindiy, aŋgñirep gey, mindrep giniŋgiy. ³Yikop ak, Gor nup kirginiŋgambay rek ayip aŋgruk.” Pen nimb niŋbim: biynimb Jiysis minim ma dipay gok, chinup timey gipay kun ak, giniŋgambay aŋgak rek nep gipay. ⁴Pen nimb yip mindiy, kisen chinup timey giniŋgambay aŋgnuk ak, nimb key niŋbim. ⁵Kun gipay kun ak niŋiy, bi timey Seytan gek, minim kosyam aŋgñen niŋbik ak kirginimimb rek ayek niŋiy, Timotiy nup aŋgen am nimbip aŋgñirep giy awak.

Timotiy Andkind Apiy Mindrep Gipay Aŋgak

⁶Pen nimbip am niŋiy apiy aŋgip, “Gor nup gosimb niŋiy, biynimb gok kuyip wasemb ay, niripmiŋay miñmiñ yimb gipay. Nirmiŋay par akniy mindiy, kuyip simb niŋbiyr rek, kiy pen miñmon kiyk okok mindiy, niripmiŋay simb niŋbay aŋgip.” ⁷Pen biynimb Jiysis nup gosimb ma niŋbay gok, chinup timey giniŋ gey mindrep ma ginuk ñin ak, Timotiy apiy, nimb Gor yip jimñiy mindpim minim ak aŋgek, chinup mindmaŋgiy lim gip. ⁸Gor nup per kun ak rek chingiy mindeniŋgambim, tep yimb gakniŋ nep mindoniŋgambun.

⁹Mindrep gipim kun ak Gor nup tep aŋgyiŋ, miñmiñ yimb gipun. ¹⁰Tip am nimbip niŋiy aŋgrop gon, mindrep yimb ginimimb aŋgiy, Gor nup pumbnamb kisyimken aŋgniŋ mindpun.

¹¹Kun ak Gor apiymiñay chinup kinjeñ yomer, mindpim ak ninjun. ¹²Biyomb chin ak nimbip gos tep yimb ñek, nimbip wasemb yimb aypun rek, nimb key penpen wasemb ay, biynimb okok kuyip wasemb ay ginimimb. ¹³Nimbip kond mindiy, kond mind dand amiy, enjol suñ-tep nuk gok diy andkind winiñgamb ñin ak niñek, biynimb suñ-tep, minim ma mindip gok nep mindenimimb.

Gor Biynimb Suñrep Nuk Mindenimimb

4 ¹⁻²Mam ay sikop. Nimb yip mindonuk ñin ak, Biyomb chin Jiysis chinup gos ñek, nimbip Gor yip yergiy mindrep gipay minim ak, aṅṅñon niñbik. Niñiy, nuk yip mindrep giyingipim rek, miñiy ar kun ak nep gem amnimuñ.

³Gor biynimb nuk mindpim ak, aṅṅip rek suñ-tep mindonjun aṅṅiy, biyn siy bi siy ma nep ginimimb. ⁴Kun ak mindrep giying, bi gok biyn nimb nokom nokom keykey diy, mindrep ginimimb. ⁵Biynimb Gor nup gosimb ma niñbay gok, biyn siy bi siy dinjun aṅṅiy, gi tapay rek ma ginimimb. ⁶Bi biyn sek gok, biyn kiyk akañ, biyn bi sek gok, bi kiyk ak siy ma dinimimb. Biynimb gunap kun ak rek geniñgambay, Gor kuyip yiwur ñiniñgamb ak, nimbip nind aṅṅrep ginuk. ⁷Tap siy tap timey giyañ aṅṅiy chinup ma dak; biynimb yand yimb mindiy, mindrep giniñgiy aṅṅiy dak. ⁸Biynimb minim aspun kun biy kirginiñgambay gok; minim chinup ak ma kirginiñgambay; Gor Biyomb Kawnan suñ-tep nuk nimbip yokip anup minim ak kirginiñgambay.

⁹Biynimb Jiysis ker mindpay gok kuyip wasemb ay, dinimimb aṅṅiy minj tikjun ak pen; Gor gos tep ñek, key niñiy penpen wasemb aypim. ¹⁰Biynimb nup Masedoniya propens mindpay gok kunep niñiy dipim. Ar kun ak nep gem amnimuñ.

¹¹⁻¹²Pen nimbip aṅṅnuk rek, biynimb gok yip kapkap mindrep ginjun aṅṅiy gem amnimuñ. Wong wariy nimb gok key giy tap ñiñnimimb. Kun ak tap keñmañgiy, maniy nimb gok key mindakniñ, tap nen asim ma aṅṅrañgem mey; biynimb Jiysis nup ma niñbay gok, nimbip niñey tep giniñgamb.

Biyomb Andkind Winiñgamb

¹³Pen mam ay sikop. Nimbip minim bap aṅṅñirep ginim. Biynimb nimb gunap kumeniñgiy, pisnep kumbay aṅṅiy, biynimb gunap simb gek siy apay rek ma aṅṅnimimb. ¹⁴Jiysis kumiy pisnep ma kumak. Nop gek tikjakiy kim mindip aṅṅiy niñbim rek, biynimb nup gosimb niñiy kumbay gok, kunep kim mindpay aṅṅiy niñbun. Kun ak Jiysis andkind winiñgamb ñin ak, Nop gek biynimb nuk kun gok dand sesek winiñgamb aṅṅiy, niñrep gipun.

¹⁵Pen Biyomb chin ak minim aṅṅñiyiñgip rek niñbun: chin biynimb kim mindnukniñ winiñgamb gok, biynimb nind kumyak gok kuyip ma

kiring amningambun; jimñiy aranjak amningambun. ¹⁶Minim bap kun biyoñ nimb “Miñiy” angyi mey, enjol yomb ak kumb gawil gaksiñ, Gor biy kul ak angaksiñ winingamb. Biynimb Krays ker mindiy kumyak gok, tikjakiy semb biyoñ aranjak amniyakniñ, ¹⁷chin biynimb nuk kim mindoningambun gok kiy yip wilikiy, aranjak am Biyomb chin ak yip perper mindoningambun.

¹⁸Kun ak nen: minim aspun kun biy penpen angy amiy apiy giy, biynimb chin Krays ker mindiy kumbay gok, yerginingamb angyi gos yomb ak ma niñnimimb; gos sek mindenimimb.

Biyomb Chin Andkind Winingamb Ak Mindrep Giyিং Kond Mindonjun

5 ¹Pen mam ay sikop, ñin akay winingamb, biynimb yerer giyakniñ winingamb ak, nimbip ma angyingayn; ²nimb key niñbim: winingamb kun ak, nup kond mindeningambay ñin ak ma winingamb. Bi tap siy dep gok, biynimb kin ambay won ak opay rek ak winingamb. ³Chinup miñiy tap bap ma giningamb angyingambay ñin ak apek, gos yomb yimb niñningambay. Kasek yinggen rek diy winingamb kun ak, biy ñapan tikniñ gey yiwur gip rek ak giningamb; pirik amningiy rek ma ayningamb.

⁴Pen mam ay sikop. Nimb kisyim wip kind ak ma mindpim; miñmon yowip kind ak mindpim. Kun ak ñin yomb kun ak apek, biynimb gunap pirikiy gos yomb niñningambay rek, chin kunep ma niñjun. ⁵Chin Seytan ñapan nuk gok windin koy mindpay rek ma mindpun: chin Gor ñapan nuk windin sek mindpun. ⁶Biynimb gunap kinamiy mindpay rek ma mindonjun; niñrep giy mindonjun. ⁷Biynimb wisin kinbay gok, kisyimken nep kinbay. Biynimb ñiñ kilis ñimbisakiy aypay gok, kisyimken nep ñimbay. ⁸Pen chin biynimb pumbnamb tapun gok, gosimb niñyিং mindenjun. Biyomb anup gosimb niñiy wasemb ay gon mey, chinup bong rek giningamb. Chinup di nop yip jimñiy ayningamb angyi niñmindiy mey, kim amningambun. ⁹Gor chinup yiwur yomb diyan angyi ma angak; Ñiyand Jiysis Krays kuyip tungasik dinimuñ angyi angak. ¹⁰Pen chinup angyi kumak ak, kim mindon winingamb akañ, kumon winingamb ak minim ma mindip; am nuk yip mindiy mindnep mindoningambun. ¹¹Pen nimb Gor biynimb nuk gunap kuyip niñem simb gonimuñ, minim tiksipiyn biy per gipim rek penpen angñirep giy, Jiysis nup chingrep giy, mindrep ginimimb.

Minim Angy Day Jiwyিং, Nimb Mindpim Angak

¹²⁻¹³Mam ay sikop. Biyomb nimbip kosyam minim tungasikyিং, minim angñiyিং mindpay gok, kuyip ma kirginimimb. Gor key angek wong kun gipay ak; kuyip wasemb ay direp ginimimb. Pen nimb mangiysek kapkap jimñiy mindenimimb.

¹⁴Biynimb woŋg ma giy mindrep ma gipay gok kuyip, minim kilis aŋgnimimb. Biynimb simb gek gospar ay mindpay gok kuyip, kapkap aŋgñirep ginimimb. Biynimb kisen Gor nup gosimb niŋsipay gok kuyip, kunep aŋgñirep ginimimb. Minek minek aŋgñiyiŋg yiruk ma niŋnimimb. ¹⁵Biynimb gunap nimbip timey geniŋgiy, pen timey ma ginimimb. Biynimb nimb key gok yip mindrep gipim rek, biynimb yikop gok yip kunep mindrep ginimimb. ¹⁶⁻¹⁸Jiysis Krays biynimb nuk mindpim ak, Gor mindip aŋgiy miñmiñ giyiŋg, nup aŋgniŋyiŋg mindem, nimbip yerer gek nup tep aŋgnimimb. Kun gem mey, nup tep yimb giniŋgamb. ¹⁹Gor Kawnan chinup gos ñinimuj aŋgiy niŋyiŋg mindenimimb. ²⁰Biynimb Gor minim aŋgep gok minim aŋgeniŋgiy ma kirginimimb. ²¹⁻²²Pen biynimb gunap yesek aŋgniŋgiy rek ayip ak, niŋrep yimb ginimimb. Gor minim yipund giy ak aŋgeniŋgiy niŋiy dinimimb; yesek aŋgeniŋgiy ma dinimimb. Timey ar gunap ma nep ginimimb.

²³⁻²⁴Gor Biyomb biynimb direp gip ak nup aŋgniŋiy apun, “Tesalonayka biynimb nip gosimb niŋbay gok kuyip, kond mindenimin ñin ar nip ak mindey, kuyip kond mindrep yimb ginimin. Biyomb chin Jiysis Krays andkind winiŋgamb ñin ak, minim bap ma mindek; gos kuŋay ma niŋniŋgiy apun.” Chin niŋbun: gos nuk key niŋiy nimbip dak ak, apun apun rek nimbip giniŋgamb. Pen nuk aŋgip rek nep gip ak, nimbip kond mindeniŋgamb ak mey, gos sek mindenimimb.

²⁵Mam ay sikop. Chinup gos niŋiy, Gor nup aŋgniŋnimimb. ²⁶Mam ay gunap kuyip niŋiy aŋgnimimb, “Pol bi gok minj tikiy apay, ‘Nimb mindpim?’ apay aŋgnimimb.” ²⁷Biyomb chin ak niŋmindip rek nimbip aspiyn, minj tiksipiyn kun biy, mam ay gok kuyip maŋgiysekiy riytiym gem niŋniŋgiy.

²⁸Biyomb chin Jiysis Krays nimbip simb niŋiy, direp giyiŋg mindonimuj.